



**ԳԱՎԱՌԻ ՊԵՏԱԿԱՆ ՀԱՄԱԼՍԱՐԱՆԻ
ՈՒՍԱՆՈՂՆԵՐԻ ՈՒՍՄԱՆ ՎԱՐՁԸ ՎՃԱՐԵԼՈՒ ԵՎ ՎԱՐՁԸ
ԱՄԲՈՂՁՈՒԹՅԱՄԲ ԿԱՄ ՄԱՍԱՄԲ ՓՈԽՀԱՏՈՒՑԵԼՈՒ**

Կ Ա Ն Ո Ն Ա Կ Ա Ր Գ

(փոփոխություններով)

I. Ընդհանուր դրույթներ

1. Սույն կանոնակարգը սահմանում է Գավառի պետական համալսարանի (այսուհետ՝ Համալսարան) ուսանողների ուսման վարձը վճարելու, ուսանողական նպաստի ձևով ուսանողների ուսման վարձը փոխհատուցելու սկզբունքները, կարգավորում փոխատեղման և մասնակի փոխհատուցման հետ կապված հարաբերությունները:
2. Համալսարանի ուսանողներն ուսման վարձը վճարում են Համալսարանի հետ կնքված պայմանագրով սահմանված չափով՝ փոխանցման կարգով, Համալսարանին սպասարկող բանկում բացված հաշվարկային հաշվին:
3. Վճարովի հիմունքներով Համալսարանի բակալավրիատի և մագիստրատուրայի առաջին կուրս ընդունված ուսանողների հետ կնքվում է պայմանագիր՝ նախատեսելով տարեկան ուսման վարձի չափը, վճարման պայմաններն ու կարգը:
4. Համալսարանի առկա և հեռակա ուսուցման ֆակուլտետների ուսանողները ուսման վարձը կարող են վճարել ըստ կիսամյակների կամ ուսումնական տարվա ամիսների՝ ուսման վարձը հավասարաչափ բաժանելով տվյալ ուսումնական տարվա ամիսների թվին՝ ըստ սահմանված ամսական վճարի նվազագույն չափի:
5. Միջանկյալ քննություններին նախորդող ամիսների ուսման վարձը չվճարած ուսանողները զրկվում են դրանք հանձնելու կամ վերահանձնելու իրավունքից:
6. Ուսանողների ուսման վարձը կարող է փոխհատուցվել ամբողջովին և մասնակիորեն՝ պետական բյուջեի, կամ (և) Համալսարանի միջոցների, ինչպես նաև Հայաստանի Հանրապետության օրենսդրությամբ չարգելված այլ աղբյուրների հաշվին՝ ընդունելության մրցույթի արդյունքների, ուսանողների սոցիալական վիճակի, բարձր առաջադիմության և հասարակական ակտիվության արդյունքների, այլ հանգամանքների հաշվառմամբ:

II. Ուսանողական նպաստի ձևով ուսման վարձավճարի լրիվ փոխհատուցում տրամադրելու կարգն ու պայմանները

7. Պետության կողմից ուսանողական նպաստի ձևով ուսման վարձի լրիվ փոխհատուցում տրամադրվում է.
 - 1/ընդունելության մրցույթի արդյունքներով ամենաբարձր միավորներ վաստակած ուսանողներին՝ այն մասնագիտությունների գծով, որոնցով հասկացվել են անվճար տեղեր,
 - 2/մեկ ուսումնական տարվա քննությունների արդյունքներով առավել բարձր առաջադիմության ցուցանիշ /միջին որակական գնահատական՝ ՄՈԳ/ ձեռք բերած ուսանողներին՝ անվճար տեղեր ունեցող մասնագիտությունների գծով, մրցութային կարգով՝ փոխատեղման (ռոտացիայի) սկզբունքով,
 - 3/առանց ծնողական խնամքի մնացած մինչև 23 տարեկան ուսանողներին,
 - 4/ 1-ին և 2-րդ խմբերի հաշմանդամ և հաշմանդամ երեխայի կարգավիճակ ունեցող ուսանողներին,
 - 5/գոհված զինծառայողների երեխա-ուսանողներին,զ/պարտադիր ժամկետային զինվորական ծառայության ընթացքում հաշմանդամ դարձած ուսանողներին:
8. Համալսարանի կողմից տվյալ ուսումնական տարում անվճար համակարգ ընդունված ուսանողների քանակի 10%-ի չափով տրամադրվում է ուսման վարձի լրիվ փոխհատուցում տվյալ ուստարում առավելագույն միավորներով վճարովի համակարգ ընդունված ուսանողներին:

Յուրաքանչյուր ուսումնական տարի Համալսարանի միջոցների հաշվին և պետության կողմից՝ ըստ Համալսարանի առկա ուսուցման բակալավրիատի և մագիստրատուրայի մասնագիտությունների հատկացված անվճար տեղերի ուսման վարձի ամբողջովին փոխհատուցման ձևով ուսանողական նպաստների քանակն անփոփոխ է և տեղափոխվում է կուրսից կուրս:
9. Պետության և Համալսարանի միջոցների հաշվին ուսման վարձի լրիվ փոխհատուցմամբ (անվճար) առաջին կուրս ընդունված ուսանողները հաջորդ կուրսերում պահպանում են իրենց անվճար սովորելու իրավունքը միայն բարձր առաջադիմության դեպքում՝ փոխատեղման մրցույթի արդյունքներով:
10. Փոխատեղման մրցույթը կազմակերպվում է նախորդող ուսումնական տարվա յուրաքանչյուր կիսամյակի քննաշրջանի արդյունքում ուսանողների ստացած տարեկան միջին որակական գնահատականի (ՄՈԳ) հիման վրա (հարյուրերորդականի ճշգրտությամբ):
11. Ուսումնական տարվա քննաշրջանների արդյունքում միևնույն պայմանների դեպքում հավասար միավորներ ունեցող երկու և ավելի ուսանողների պարագայում ուսման վարձի լրիվ փոխհատուցում 2-րդ կուրսում տրվում է 1-ին կուրսի վերջին կիսամյակի քննաշրջանի արդյունքում առավել բարձր առաջադիմություն ցուցաբերած ուսանողներին, հաջորդ կուրսերում՝ նախորդ ուսումնական տարվա,

իսկ վերջինիս հավասարության դեպքում՝ դրան նախորդող ուսումնական տարվա քննությունների արդյունքներով Համալսարանում առավել բարձր առաջադիմություն ցուցաբերած ուսանողներին:

12. Սույն կանոնակարգի 11-րդ կետում նախատեսված ցուցանիշների հավասարության դեպքում փոխատեղման մրցույթն անցկացվում է նախորդ ուսումնական տարվա երկու կիսամյակների ընթացքում ուսանողների հանձնած քննությունների գնահատման նիշերով: Վերջիններիս հավասարության դեպքում իր կարգավիճակը պահպանում է նախորդ ուսումնական տարում անվճար տեղում սովորած ուսանողը:
13. Թափուր տեղեր առաջանալու դեպքում փոխատեղման մրցույթն անցկացվում է լուծարային շրջանի արդյունքներով՝ նախապատվությունը տալով առարկայական պարտքերի մարման առաջին շրջանում քննությունները հանձնած հավակնորդ ուսանողներին:
14. Տարբեր պատճառներով ուսումնառությունն ընդհատած, ապա վերականգնված, այլ բուհերից կամ Գավառի պետական համալսարանի այլ մասնագիտություններից տեղափոխված ուսանողները նպաստներից կարող են օգտվել տվյալ մասնագիտությամբ մեկ ուսումնական տարի սովորելուց հետո:
15. Փոխատեղման մրցույթին մասնակից ուսանողների ցուցակը ֆակուլտետի դեկանի կողմից ներկայացվում է ֆակուլտետի մանդատային հանձնաժողովի քննարկմանը: Մանդատային հանձնաժողովը, ըստ տվյալ կուրսի, տվյալ մասնագիտությանը հատկացված նպաստների թվաքանակի, իրականացնում է մրցույթ և կազմում նպաստառու ուսանողների ցուցակը, որը պարտադիր վավերացվում է մանդատային հանձնաժողովի կողմից: Ցուցակի կազմման համար ձևակերպվում է արձանագրություն (2 օրինակից), որտեղ պարտադիր կարգով գրանցվում են մանդատային հանձնաժողովի անդամների կարծիքները և հնարավոր վերապահումները: Արձանագրությունը ստորագրվում է մանդատային հանձնաժողովի նախագահի և քարտուղարի կողմից:
16. Ցուցակները և արձանագրությունները համապատասխան ֆակուլտետի դեկանի կողմից ներկայացվում են Համալսարանի մանդատային հանձնաժողովի քննարկմանը և հաստատմանը: Համալսարանի մանդատային հանձնաժողովի կողմից հաստատված ցուցակները հրապարակվում են ֆակուլտետներում: Ցուցակների վերաբերյալ դիմում-բողոքները եռօրյա ժամկետում պետք է ներկայացվեն Համալսարանի մանդատային հանձնաժողովին: Հանձնաժողովը քննարկում է ներկայացված դիմում-բողոքները, հաստատում ուսանողական նպաստի ձևով ուսման վարձի լրիվ փոխհատուցում ստացող ուսանողների վերջնական ցուցակները և ներկայացնում Համալսարանի ռեկտորին՝ հրամանագրման: Ռեկտորի հրամանով ուսման վարձավճարի լրիվ փոխհատուցում ստացող ուսանողների հրամանագրումից հետո ուսանողների այլ ուսումնական հաստատություն կամ այլ մասնագիտության փոխադրվելու, ինչպես նաև Համալսարանից ազատվելու դեպքերում ազատված ուսանողական նպաստներն այլ ուսանողների չեն տրամադրվում:

17. Համալսարանի ռեկտորի հրամանում պարտադիր կարգով նշվում է նպաստի տրամադրման ժամկետը՝ տվյալ տարվա սեպտեմբերից մինչև հաջորդ տարվա օգոստոսի 31-ը:
18. Սույն կանոնակարգի 15-րդ կետում նշված ցուցակներում անճշտություններ, վրիպումներ, սխալներ, ինչպես նաև ցուցակների կազմման ընթացակարգի խախտումներ հայտնաբերելիս՝ Համալսարանի մանդատային հանձնաժողովն իրավասու է տվյալ մասնագիտության նպաստառուների ցուցակը հետ վերադարձնել տվյալ ֆակուլտետ՝ նոր մրցույթի կազմակերպման պահանջով: Սխալներ և ընթացակարգային խախտումներ թույլ տված անձինք ենթակա են կարգապահական տույժերի, որոնք ձևակերպվում են Համալսարանի ռեկտորի հրամանով:

III. Ուսանողական նպաստի ձևով ուսման վարձավճարի մասնակի փոխհատուցում տրամադրելու կարգն ու պայմանները

19. ՀՀ օրենսդրությամբ սահմանված կարգով ուսանողական նպաստի ձևով ուսման վարձի մասնակի փոխհատուցում՝ առնվազն 20%-ի չափով, կարող են ստանալ բակալավրիատում առավելագույն ՄՈԳ-ի 75%-ի շեմը և մագիստրատուրայում՝ 80%-ի շեմը հաղթահարած այն ուսանողները, ովքեր ունեն հետևյալ կարգավիճակները.
- սոցիալապես անապահով (ընտանիքների անապահովության սահմանային միավորից բարձր միավոր ունեցող) ընտանիքների անդամ-ուսանողներ են,
 - 23 տարին չլրացած միակողմանի ծնողազուրկ (միածնող) ուսանողներ են,
 - մինչև մեկ տարեկան երեխա ունեցող ուսանողներ են,
 - երեք և ավելի անչափահաս կամ Համալսարանում երեք և ավելի ուսանող երեխաներ ունեցող ընտանիքների անդամ-ուսանողներ են,
 - մարտական հերթապահություն իրականացնող զորամասերում մարտական հերթապահության մեջ ընդգրկված պարտադիր ժամկետային զինվորական ծառայություն անցած ուսանողներ են,
 - Արցախի Հանրապետության պաշտպանության ժամանակ մարտական գործողությունների մասնակցի կարգավիճակ ունեցողների զավակներ են կամ մասնակիցներ են,
 - Համալսարանի աշխատակիցների երեխա-ուսանողներ են,
 - բացառիկ դեպքերում՝ այլ կարգավիճակ ունեցող ուսանողներ են:
20. Համալսարանում ուսանողական նպաստի ձևով ուսման վարձի մասնակի փոխհատուցում (զեղչ) ստանալու մասին դիմումներն ընդունվում են առկա ուսուցման համակարգում սովորողների համար սկսած յուրաքանչյուր տարվա օգոստոսի 15-ից մինչև սեպտեմբերի 15-ը, իսկ հեռակա ուսուցման համակարգում՝ դեկտեմբերի 25-ից մինչև հունվարի 25-ը:
21. Դիմումների հետ ներկայացվում են սույն կանոնակարգի 7-րդ և 20-րդ կետերում նախատեսված տարակարգերին պատկանելու (կարգավիճակ ունենալու) մասին համապատասխան փաստաթղթերը (սոցիալական ապահովության մարմնի,

բժշկական հանձնաժողովի, զինվորական կոմիսարիատի և այլ տեղեկանքներ), ՄՈԳ-ի սահմանված շեմը հաղթահարելու մասին համապատասխան ֆակուլտետի դեկանի զեկուցագիրը, ուսանողական խորհրդի միջնորդությունը, այլ փաստաթղթեր:

22. Երկու և ավելի կարգավիճակներին համապատասխանելու, կամ մի քանի արտոնություններին հավակնելու դեպքում ուսանողը կարող է օգտվել մասնակի փոխհատուցման միայն այն հնարավորությունից, որի դեպքում կիրառվում է մասնակի փոխհատուցման առավելագույն չափը:
23. Համալսարանից հեռացված կամ ազատված անձանց կողմից մինչ այդ վճարված ուսման վարձը հետ չի վերադարձվում և վերականգնվելիս՝ հաշվի չի առնվում: Նրանց հետ սահմանված կարգով կնքվում է նոր պայմանագիր՝ նոր վարձաչափի նշումով:
24. Ուսանողական իրավունքները վերականգնած և ակադեմիական տարբերություններով ու առարկայական պարտքերով պայմանավորված ուսումնական տարին կրկնող ուսանողները վճարում են ուսման վարձ՝ Համալսարանի հետ կնքված նոր պայմանագրով սահմանված չափով ու կարգով:
25. Մինչ ուսումնական տարվա առաջին կամ երկրորդ կիսամյակի սկիզբը ուսումնական վարձը վճարած, դասերին չմասնակցած և Համալսարանից ազատման մասին դիմում ներկայացրած անձանց վարձը ենթակա է հետ վերադարձի՝ վճարած գումարի 10%-ի պահումով:
26. Համալսարանի մի ֆակուլտետից (բաժնից) մյուսը տեղափոխվելու, այլ բուհերից Համալսարան տեղափոխվելու, երկրորդ մասնագիտություն ստանալու, շարունակական կրթության կարգով միջին մասնագիտական ուսումնական հաստատությունները ավարտելուց հետո Համալսարանում ուսումը շարունակելու մասին դիմումներ ներկայացրած, ինչպես նաև հեռացված, տարկետում ստացած, ապա վերականգնված անձինք՝ բացառությամբ զինձառայության հիմքով տարկետում ստացած անձանց, առարկայական տարբերությունների կամ քննաշրջանի հանձնման, ամփոփիչ ատեստավորման, այլ ակադեմիական առաջադրանքների կատարման գործընթացը կազմակերպելու համար Համալսարանին նախապես վճարում են համապատասխան կրեդիտների արժեքի չափով՝ ըստ իրենց ընտրած մասնագիտության համար տվյալ ուսումնական տարում սահմանված տարեկան ուսման վարձի, որը հետ չի վերադարձվում, եթե անձը առարկայական տարբերությունները չի հանձնել, այլ ակադեմիական առաջադրանքները չի կատարել և չի հրամանագրվել: Մեկ կրեդիտի արժեքը որոշվում է ուսման տարեկան վարձի և ուսումնական տարվա ընդհանուր կրեդիտների հարաբերությամբ, սակայն տարբերությունների հանձնման պարագայում կրեդիտների քանակը հաշվարկվում է 0.4 գործակցով, հաշվի առնելով բազմագործոն գնահատման համակարգում եզրափակիչ ստուգմանը տրվող հարաբերական կշիռը: